

主席先生、各位議員、各位朋友

我係香港航空青年團司令梁冠平，非常感謝能夠有機會再次出席規劃地政及工程事務委員會嘅會議。

上次會議我已經詳細闡釋香港航空青年團就推動香港青少年發展航空教育嘅貢獻，而今次會議議程文件亦包括民政事務局、經濟發展及勞工事務局、公益金同社聯對香港航空青年團一直以來貢獻嘅認同及支持我地保留啓德嘅總部。我並唔打算在此阻大家時間。

我想藉今次機會比較集中向各位提出，如果社會大眾係想香港航空青年團繼續服務廣大市民，繼續運作、發展，我地係需要有一個永久之地，我地就此提出三個方案：

第一個方案(即係附件 A)：係同我地嘅盟友香港飛行總會合共用現在宋皇台道現址，而大家都知道我地有成四千幾隊員，以我地一貫以來嘅良好表現，我地總部反而係香港十一支制服團體最細嘅，只有大約二千呎，因此如果繼續使用宋皇台道我地無可避免係要在原址稍作擴展，與飛行總會就用地地上作適當地重新分配。

例如方案中 Zone One 及 Zone Two 嘅建築，Zone Two 嘅一部份地方，我地都須要利用作發展，否則大家可以想像得到有可能支持一個四千幾人嘅團隊。

而相對地，如果航空青年團、飛行總會一共五千人嘅兩個組織共用宋皇台道，現時嘅規劃處提出要縮小宋皇台道現址就絕對唔係一個實際及可行嘅構思。試想宋皇台公園嘅入口係唔係一定唔改得，相對而言，五千人嘅兩個組織總部面積被削去一半，如何能正常運作？做成對香港整體青少年發展、航空人材培訓嘅損失，是否可以彌補？只要將宋皇台公園稍作重新規劃，問題就可迎刃而解，各位是否應該認真考慮！

第二個方案係完全撤離宋皇台道。紅磡鶴園街嘅前民安隊少年團基地正在空置中，如果其他方案行唔通，我地都好有興趣發展鶴園街成為新一代既團隊總部，希望各政策局及部門能夠支持我地，民安隊少年團人數及工作範疇都同我地航空青年團相若，因此鶴園街如果由我地接手，亦係可以解釋及順理成章的事。

儘管這個方案係要撤離宋皇台道，我地仲係好有興趣參予發展將來在啓德既航空博物館。

第三個方案係兼承第一、二階段諮詢既航空發展中心構思，在宋皇台道附近，又或者啓德範圍內其他地段，撥地與航空青年團建設新總部。

第二、三方案較詳細之土地要求，我地將會呈上規劃處及有關政策局。

無論邊一個方案，我地團隊都會積極參予啓德社區事務，例如將來體育館有大型節目需大量人手協助，我地都會義不容辭傾全力協助。

多謝各位。